

## Umalõ Pidoõ oodõtas "kunnakuurõ"

**29. mail 2010 Põlvan tulõvalõ võrokeelitsele laulupidolõ Uma Pido oodõtas päält 3000 koorilaulja seokõrd viil väega ummamuudu kuurõ – kunnakuurõ. Kõrraldaja' härgütäse' säandsit kuurõ kokko pandma pere-, sugu-, sõprus- vai kogokundõ. Kunnakoori' saava' ütten astu pido rongikäügin ja laulda' pääkontsõrdil ütiskuurõ jao seen ütewelüldise lauluga.**

Kõrraldaja uutva muidoki, et kunnakuur pantanu kokko viisipidäjist lauljist. Kõigil kunnakuurõl pallõldas hinnäst kirja pandõn teedä' anda, mitu miist-naist-last näid om, miä om koori nimi ja mändse kihlkunna sildi all rongikäügin astu tahetas. Kirjapandmiseleht om sai' pido kodolehe [www.umapido.ee](http://www.umapido.ee) päält lingi "esinejate info" all.

Kunnakuur piät hindä hulgast vällä valima koori pääkunna, kiä koori har'otamist ja kuunkäümist iist võtt ja kooril laulu' selges saia' avitas. Kunnakoori pidolõ saamisõ tingimusõs om pääkunna tulõk opipääväle, vai pääkunnõ päästoppusõlõ, miä om pähpäävä, 7. märtsil kell 13.00. Võro Instituudin (Võro, Tartu tn 48). Sääl har'otadas laulõ, antas oppus ja jaetas laulikit. Keväjä inne Umma Pido tulõ ka kunnakuurõ pääpruuv.

Har'otamisõ aigu saava' kunnakoori' nõvvu ja api kunnakuurõ pääkunnalt Silja Otsarilt, kiä avitas kunnakuurõl ütiskuurõ hulgan toimõtulõkis valmis saia'. Egä kooriliigi pidolaulõ sian om säandsit, midä saa publik ütten laulda', nii sõs luut Otsar, et parõmba' kunnakoori' ka tõisi laulõ päält ütiskuurõ ummi är opva'. "Niimuudu om pidol ka publiku siast inämb laulu kuulda'," kõnõlõs Otsar.

"Oodami põnövit kuurõ põnöviidõ nimmi ja lukõga," kõnõlõs pido projektijuht Triinu Ojar. "Ma lasõ fantaasial linnada' ja tuu edimäidsi päähätulõvit näütit: Rahvatandsurühmä kunnakuur, Poodisaina Tugõmisõ Klubi kunnakuur, Kooli Oppajidõ Tarõ kunnakuur ja nii edesi. Lõüdke, miä teid kõüt – olkõ tuu sõs tandsminõ ütten rahvatandsurühmän, ütten orkestrin mängmine vai viil midägi muud – ja pankõ kuur kokko!" soovitas Ojar.

Võrokeeline laulu- ja rahvapido Uma Pido tulõ seo kevväi tõist kõrda. Edimäne pido oll' 30. mail 2008 Võrol Kubija laululava päält. Aoluulinõ võro keele- ja kultuuriruum om a hoobis suurõmb ku Võro maakund: sinnä ala käü suurõmb jago nii Võro ku Põlva maakonnast. Tuuperäst omgina tõnõ pido Põlvan. Pido tegevä' esierälidses umakeelisüs ja Vana Võromaa kihlkundõ ummamuudu olõki vällätuuminõ.

Pidolõ oodõtas 3000 lauljat üle terve Lõuna-Eesti, a ka muialt Eestist, niisamatõ küläliisi vällämaalt. Pido rongikäügin astva' koori' mitte maakunna- vai vallasilte perän. Egä kuur vali hindäle vana Võromaa katsa kihlkunna vai silte "sõbra' ja sugulasõ'" vai "seto sõsara' ja vele'" siast kõgõ õigõmba. Sääne hindätiidmise vällämärkmine tege pidost ummi juuri pääle mõtlõmisõ pido.

Uma Pido olõ-i sõski õnnõ laulupido: pidopäävä tähtsä osa om samal pääväl Põlva liinan olõv pääväprogrammi kontsõrtõ, laadu ja tüütarriga. Päävä nagõl om õdagunõ pääkontsõrt Intsikurmu lauluväljaku päält.

9. veebruaril 2010

Triinu Ojar

II Uma Pido projektijuht

Tel 533 22 153, [www.umapido.ee](http://www.umapido.ee)